

**Uunga siunnersuut: Gassileriviit, gassinut atortut aamma akuersissuteqarnissamut piumasaqaatit pillugit Inatsisartut inatsisaat nr. xx, yy 2014-imeersoq.**  
(Avatangiisinut Pinngortitamullu Naalakkersuisoq)

**Saqqummiussissut**

(Avatangiisinut Pinngortitamullu Naalakkersuisoq)

**Siullermeerneqarnera**

Inuiaqatigiinni najukkatsinni sumiiffinni assigiinngitsorpassuarni gassileriveqarpoq: Atuarfinni, igaffinni, neriniartarfinni allanilu. Gassileriviit peqqissutsimut inuiaqatigiinnilu pigisanut naleqartunut annertuumik ulorianartorsiorfitsinnaapput. Gassimik seerisoorneq aammalu gassimik tamakkiisuunngitsumik ikuallaanermi aniasoorneq toqunartumik sunnerneqarnermik ipinermillu kinguneqarsinnaapput. Gassilerivinnit kukkusumik sananeqarsimasunit tamanna pilersinnaavoq. Tamatuma saniatigut gassi ikuallajalluinnartuuvoq, ikuallannermik gassimillu qaartoornermik pilersitsisinnaalluni.

Inatsisissatut siunnersuummi gassilerivinnut atatillugu inuit inuiaqatigiillu pigisaasa nalillit isumannaallisaanikkut peqqissutsikkullu ulorianartorsiorfiusunut ilaatigut gassileriviit atortuisa sananeqarsimasut pitsaassusiinik qaffaanikkut illersorneqarnissaasa siuarsarneqarnissaa siunertarineqarpoq.

Gassilerivinnut suliassaqaarfimmi allagartamik akuersissummik pigisaqarnissamut piumasaqaammik atulersitsinissaq inatsisissatut siunnersuummi sunniiniutissatut pingaarnersaavoq. Allagartamik akuersissummik pigisaqarnissamut piumasaqaammi inuit suliffeqarfiillu, gassimut atortulersuutunik suliqaartut teknikkikkut piginnaasanik ilisimasanillu pisariaqartinneqartunik pigisaqarnissaat qulakkeerneqassaaq.

Taamaalilluni gassimik suliqaqarnissamut allagartamik akuersissummik peqarnissamik aaqqissuussinermi, gassilerinermut atortulersuutit atorlugit niueruteqarnermi pissutsinik pitsaanagerusunik pilersitsinissaq siunertarineqarpoq. Tamanna VVS-ilerinermik suliqaartunit ujarorneqarpoq, taamaattumillu inatsisissatut siunnersuut atuisunut inuussutissarsiortunullu iluaqutaassaaq.

Inatsisissatut siunnersuut ikaarsaarnermut aaqqissuussinermik imaqarpoq, tamatumalu kingunerisaanik inatsisissatut siunnersuut akuerineqassappat allagartamik akuersissummik pigisaqarnissamut piumasaqaat aatsaat 1. januar 2016-imi atuutilissaaq. Suliffeqarfiit inuillu gassilerivinnik suliqaartut allagartamik akuersissummik pissarsinissamut piffissaqartinneqarnissaat siunertarineqarpoq.

Siunissami allagartamik akuersissummik pissarsigaanni, gassilerinermut teknikkimut pikkorissarneq angusiffiusimassaaq. Kalaallit Nunaanni Innaallagisserinermut Oqartussaasut allagartamik akuersissummik pissarsinissamut piumasaqaatinut maleruagassanik sukumiinerusunik aalajangersaanissamut piginnaatinneqassapput.

Tulliatut inatsisissatut siunnersuummi Kalaallit Nunaanni Innaallagisserinermut Oqartussaasut gassilerinermut malittarisassanik, gassimut ikkussukkat qanoq sularineqartarnissaat pillugu malittarisassanik imalinnik, suliqaqarnissamut piginnaatinneqassapput. Gassilerinermi teknikkimut suliassaqaarfimmi ullumikkut nunani tamalaani pitsaassusissat annertuumik tunngavigineqarput, aammalu Kalaallit Nunaata ineriartornermut tassunga malinnaanissaa pingaaruteqarpoq.

Taamaalilluni Kalaallit Nunaata gassilerinermi teknikkimut suliassaqaarfimmut naleqquttumik inatsiseqarnissaa inatsisissatut siunnersuummi pingaarnertut qulakkeerneqassaaq.

Taamatut oqaaseqarlunga inatsisissatut siunnersuut Inatsisartuni kajumittumik suliassanngorlugu tunniuppara.